



Sambanwá

GIYA SA PAGSAMBA KAN BANWAAN NIN DIOS

IKA-XX DOMINGO KAN
ORDINARIONG PANAHON
16 Agosto 2020 (Verde) • Taon A

PAGHOROP-HOROP

Rev. Fr. Luisito A. Occiano

Sa Evangelio niato ngonian, nadangog niato an istorya kan babaeng taga Canaan na igwa nin tolong rason na mayo siyang derecho na maghagad nin pabor ki Hesus. Enot siya sarong babae, para sa mga Judeo an babae hababa sa kumunidad. Dai pinagtatawan nin halaga. Panduwa, siya sarong taga Canaan pigkokonsiderang sinda mga kaiwal kan mga Israelita asin pangtolo siya sarong pagano. Para sa mga Judeo, an mga pagano mayong lugar sa sociedad nin huli ta maati an saindang rasa.

Kun sa kawat na baseball, an babae sa Evangelio, *struck out* na sa karawat. Mayo na siyang paglaom na makukua an saiyang hinahagad.

Igwang kasabihan si Winston Churchill *“Success is stumbling from failure to failure wiith no loss of enthusiasm.”* An kapangganahan iyo an pagbangon sa paulit ulit na kadaogan na kun saen dai nawawara an sigasig asin kamawotan sa buhay.

Totoo an babae sa Evangelio igwa nin tolong kakundian o kaulangan. Alagad igwa man siyang tolong mahahalagang bagay na kaipuhan nin sarong nagmamawot nin kasimbagan sa saiyang kahagadan.

Enot an babae igwa nin tunay na pagkamoot. Bilang ina, an saiyang pagkamoot sa saiyang aki mayong pakakaulang. Totoo sarong pagano, alagad maski ngani siya siring, an saiyang pagkamoot dakulaon na maray. An pagkamoot niya nakakaagid sa pagkamoot nin Dios na gigibohon an gabos mailigtas sana kita. Sa siring na pagkamoot, natanyog si Cristo.

Panduwa, siya babaeng igwang pagtubod. Inapod niya si Jesus na Aki ni David. Saro ining titulong pampolitika alagad pano nin kahulugan asin respeto. Digdi minapoon an pagtubod niato, na mamidbidan niato si Cristo asin igalang niato siya sa satong pagkabuhay aroaldaw.

Asin an pantulo, siya pursigido. Dai nagsusuko tolos. Sa saiyang pagpamibi maski tolong beses siyang sinayumahan, paulit ulit man giraray siyang nakemaherak. Siya sarong modelo nin pag-pamibi asin kapakumbababaa. Para saiya, an pamibi bakong ritual kundi sarong kamawotan na makarani sa Dios, asin kamawotan na masimbag an saiyang pag-arang ki Hesus.

Dakul kitang mga kahagadan sa buhay. Ngonian na mga aldaw, afuera sa pakimaherak saiya na tabangan kita sa satong inaagihan na pandemia, dakul pa kitang mga personal na pangangaipo.

Kun sa enot nakasentro kita sa pagkatawo kan babae, alagad katapus-tuposi kaini, mahihiling niato an daing sagkod na pagkamoot ni Cristo sato gabos. Mayo siyang pinipiling rasa or relihiyon. Siya an Dios na magpapaumay sa gabos. Dai sana kita magluya kundi padagos na magsarig asin magtubod sa saiyang kapangyarihan asin pag-ampon.

RITO SA PAGPOON

Introduccion

C — “An Kaligtasan para sa gabos.”

Inotob ni Cristo an mision asin kaligtasan para sa gabos. Minawot niya na an gabos madara sa Kahadean nin langit. An tema kan Liturgia niato ngonian na Domingo iyo na an gabos inaapodan na magbaklay sa dalan nin kaligtasan. Ipamibi niato sa celebracion kan Eucaristia na gabos kita magkaboronyog sa paghingoa na makamtan an gracia nin kaligtasan.

Antifona sa Paglaog (S 83, 10-11)

(Sinambit kun mayo nin Awit sa Paglaog)

O Dios, samong Parasurog, hilinga, asin torohoki an lalawgon kan saimong Cristo, ta an sarong aldaw sa saimong mga eerokan orog na marahay kisa rinibo.

Pataratara (Tindog)

P — Sa ngaran kan Ama, asin kan Aki, asin kan Espiritu Santo.

B — Amen.

P — An Kagurangnan mapasaindo.

B — Asin sa saimong espiritu.

Gawe nin Pagsolsol

P — Mga tugang, akoon ta an satong mga kasalan, tanganing magkanigo kitang magcelebrar kan mga banal na misterio.

(Halipot na pagtoninong)

Gabos — Nagkukumpisal ako sa Dios na makakamhan, asin saindo, mga tugang, ta nagkasala ako nin makuri sa isip, sa tataramon, sa gibo, asin sa kapabayaan: sala ko, sala ko, makuring sala ko. Kaya nangangadyi ako ki Santa Maria, danay na Virgen, sa gabos na Angeles asin Santos, asin saindo, mga tugang, na ako ipamibi sa Kagurangnan tang Dios.

P — Maherak man lugod sato an Dios na makakamhan asin, pakapatawada an satong mga kasalan, darahon kita sa buhay na daing kasagoran.

B — Amen.

Kagurangnan, maherak ka

P — Kagurangnan, maherak ka.

B — Kagurangnan, maherak ka.

P — Cristo, maherak ka.

B — Cristo, maherak ka.

P — Kagurangnan, maherak ka.

B — Kagurangnan, maherak ka.

Kamurawayan

Gabos — Kamurawayan sa Dios sa kaitaasan asin sa daga katoninongan sa mga tawong marahay an boot. Inoomaw mi ika, rinorokyaw mi ika, sinasamba mi ika, pinapamuraway mi ika, pinapasalamatan mi ika huli kandakula mong kamurawayan,

Kagurangan na Dios, Hadeng langitnon, Dios Amang makakamhan. Kagurangan Aking Bogtong, Jesu Cristo, Kagurangan na Dios, Cordero kan Dios, Aki kan Ama, ika na nagpapara kan mga kasalan kan kinaban, kaheraki kami; ika na nagpapara kan mga kasalan kan kinaban, akoa an samong pakimaherak; ika na nagtutukaw sa too kan Ama, kaheraki kami. Ta ika sana an Banal, ika sana an Kagurangan, ika sana an Orog Kahalangkaw, Jesu Cristo, kaiba kan Espiritu Santo: sa kamurawayan kan Dios Ama. Amen.

Colecta

P — Mamibi kita. (*Halipot na pagtoninong*)

Ika, O Dios, na nag-andam para sa mga namomoot saimo kan mga dai-nahihiling na karahayan, pabulosa an kaladman kan pagkamoot mo sa samong mga puso, tanganing, kaming namomoot saimo sa gabos asin orog pa sa gabos, magkamit kan saimong mga panuga, na nangongorong sa gabos na pagmawot. Huli ki Jesu Cristong Kagurangan ni amo, saimong Aki, na kaiba mong nabubuhay asin naghahade, kasarô kan Espiritu Santo, Dios, sa gabos na kapanahonan kan mga panahon.

B — Amen.

LITURGIA NIN TATARAMON

Enot na Babasahon

(Isaias 56, 1. 6-7) (*Tukaw*)

Ipinapahayag sa enot na babasahon na yaon an invitacion kan Dios para sa gabos na makisumaro sa gawe nin pagpapabanal.

Pagbasa sa Libro ni Profeta Isaias

Ini an sabi nin Kagurangan: “Giboha an katanosan, huli ta tolos madatong an sakong kaligtasan asin an sakong pagtubos ipapahayag. An mga taga-ibang banwa na maayon sa Kagurangan, sa paglingkod saiya tanganing mamotan an ngaran nin Kagurangan asin magin saiyang mga surogon: sa lambang sarô na naghehele kun sabado, asin dai kaiyan nagbabasang-basang, asin nag-uutob kan saiyang tipan – an mga aking ini sakong dadarahon sa sakong banal na bukid, asin ipag-oogma ninda an sakong banal na bukid, asin ipag-oogma ninda an sakong harong nin pamibi; an saindang mga tinutong na atang asin mga dolot aakoon sa sakuyang altar, huli ta an sakong harong nin pamibi para sa gabos na banwaan.”

An Tataramon nin Kagurangan.

Gabos — **Salamat sa Dios.**

Salmo Responsorio

(Salmo 67, 2-3. 5. 6. 8)

R — **O Dios, pag-omawon ka nin gabos na banwaan.**

1. Bendicionan kita nin Dios asin magliwanag satuya an saiyang lalawgon; an saimong dalan ikapahayag sa kinaban, an saimong

kaligtasan ikapahayag sa gabos na banwaan. (**R**)

2. Mag-ogma an gabos na banwaan asin mag-awit na maogma, huli ta matanos an saimong paghukom sa katawohan, asin inaampon mo an mga banwaan sa ibabaw nin daga. (**R**)

Ikaduwang Babasahon

(Roma 11, 13-15. 29-32)

Si San Pablo naglingkod para sa gabos. Siya man magrokyaw kan Marahay na Baretta sa mga pagano.

Pagbasa sa Surat ni San Pablo sa mga taga-Roma

Ini an sinasabi ko saindo na mga pagano: Sinugo ako sa mga pagano bilang Apostol nindo, asin kaogmahan ko na ako sinugo; alagad an katuyohan kaini iyo kun paanong magibo ko na arogon kamo kan sakuyang mga kadugo asin ikaligtas ko an nagkapira sainda. Kun huli kan pagsikwal sainda, an kinaban nakabalik sa Dios. Ano an magiging kahulugan kun sinda akoon giraray? Mayong iba kundi pagkabuhay-liwat gikan sa kagadanan. Dai binabawi nin Dios an saiyang mga balaog asin an saiyang pag-apod. Kamo kaidto nagsombikal sa Dios asin ngonian kamo naherakan huli kan saindong kasombikalan. Siring man ngonian sinda nagsombikal tanganing kahehakan, siring na kamo naherakan. An gabos na tawo ilinalaom nin Dios sa kasombikalan, tanganing an gabos saiyang maherakan.

An Tataramon nin Kagurangan.

Gabos — **Salamat sa Dios.**

Pagrokyaw (*Tindog*)

(*Sinasambit kun dai inaawit an Alleluia*)

Alleluia, alleluia! Buksan mo an samong mga puso, Kagurangan, sa paghinanyog kan tataramon nin saimong Aki. Alleluia, alleluia, alleluia!

Evangelio

(Mateo 15, 21-28)

Ipinapahayag sa Evangelio na an Kahadean nin Dios bukas para sa gabos na nagtutubod.

P — Pagbasa kan Evangelio na Sinurat ni San Mateo.

B — **Kamurawayan saimo, Kagurangan.**

Si Jesus nagpasiring sa Tiro asin Sidon. Asin sarong babaeng Cananea sa rona na idto nagkurahaw saiya: “Kagurangan, Aki ni David, kaheraki ako. An sakuyang aking daraga may demonio.” Dai sinimbag ni Jesus. Kaya dinolok siya kan mga disipulos asin kinaolay: “Dangoga man ta nagsusunod sato asin nagkukurahaw.” Sinimbag sinda ni Jesus: “Sinugo ako para sana sa mga nalalagalag na mga kamero sa Israel.” Inabot sinda kan babae, nagsamba asin nakimaherak: “Kagurangan, tabangi man ako!” Si Jesus nagsimbag: “Bakong marahay na an tinapay para sa mga aki kuanon asin ibahog sa ayam.” Alagad an babae nagsabi: “Totoo, Kagurangan; alagad an mga rakdag nahuhulog sa lamesa nin kagsadiri.” Si Jesus nagsabi saiya: “Babae

dakulang gayo an saimong pagtubod! Mautob man lugod an saimong minamawot.” Sa oras na idto narahay an saiyang aki.

P — An Marahay na Baretta nin Kagurangan.

B — **Pag-omaw saimo Cristo.**

Homilia (*Tukaw*)

Pagrokyaw kan Pagtubod (*Tindog*)

Credo Niceno-Constantinopolitano

Gabos — Nagtutubod ako sa sarong Dios Amang makakamhan, kaggibo kan langit asin daga, kan gabos na nahihiling asin dai nahihiling. Asin sa sarong Kagurangan na si Jesu Cristo, Bogtong na Aki kan Dios, asin namundag gikan sa Ama bago kan gabos na panahon. Dios na gikan sa Dios, ilaw na gikan sa ilaw, totoong Dios na gikan sa totoong Dios, ipinangaki, dai linalang, saros a pagka-Dios sa Ama: huli saiya nagkaigwa kan gabos. Huli sa satong mga tawo asin huli sa satong kaligtasan naghilig siya hale sa kalangitan.

(*Sa mga minasunod na tataramon, abot sa asin nanitawo, an gabos minaduko.*)

Asin nani-laman huli kan Espiritu Santo ki Virgen Maria, asin nanitawo. Ipinako pa sa cruz para sato kan panahon ni Poncio Pilato; nagtios sagkod sa kagadanan asin ilinobong, asin kan ikatolong aldaw nabuhay-liwat sosog sa mga kasuratan, asin suminakat sa langit, nagtutukaw sa too kan Ama. Asin mamuraway na mabalik, sa paghukom sa mga buhay asin mga gadan, an saiyang kahadean daeng katapusan. Asin sa Espiritu Santo, Kagurangan asin kagtao nin buhay: na gikan sa Ama asin sa Aki. Siya kaiba kan Ama asin kan Aki, sabay na sinasamba asin pinapamuraway: siya nagtaram sa paagi nin mga profetas. Asin sa saro, banal, catolico asin apostolicong Simbahan. Nagpapahayag ako nin pagtubod sa sarong bonyag, sa pagpatawad nin mga kasalan. Asin naghahalat ako kan pagkabuhay-liwat nin mga gadan, asin kan buhay sa maabot na panahon. Amen.

Pamibi nin Banwaan

P — Sararô sa pagkamoot, may pagsarig kitang magdolok sa Ama huli ta dai niya sinasayumahan anoman hagadon ta saiya sa pagtubod.

R — **Kagurangan, hinanyoga an samong pamibi.**

1. Tanganing an Simbahan sa bilog na kinaban magin burabod kan pagkaherak, katoninongan asin pagkamoot kan Dios: mamibi kita sa Kagurangan. (**R**)
2. Tanganing bilang sarong comunidad nin mga paratubod dai kita magtugot na masiblag huli kan pagkaongis asin paghukom sa kapwa: mamibi kita sa Kagurangan. (**R**)
3. Tanganing an mga ina na nahohorasa asin naghahadit dapit sa salud kan saindang kaakian dai nanggad

malinaw na magdolok ki Cristo sa paghagad tabang asin ginhawa: mamibi kita sa Kagurangnan. (R)

4. Tanganing an mga naghehelang sa satuyang comunidad maranga asin kamotan kan mga nag-aataman sinda: mamibi kita sa Kagurangnan. (R)
5. Tanganing an mga gadan mag-ogma sagkod pa man sa saindang langitnon na eerokan: mamibi kita sa Kagurangnan. (R)

P — O Dios na makakamhan, samuyang kusog asin pailihan, kamawotan mo na magkasarô an gabos na tawo. Gibohan kami danay na mapagmagnô sa mga pangangaipo kan samuyang kapwa asin dai naggad magsikwal sa kiisay man sa samuyang pag-iriba. Huli ki Cristo samong Kagurangnan.

B — Amen.

LITURGIA NIN EUCARISTIA

Ofertorio (*Tukaw*)

(*Kun dai inaawit an Awit sa Pagdolot*)

P — Inoomaw ka, Kagurangnan, Dios nin gabos na linalang, huli ta sa saimong pagka-matinao nag-ako kami nin tinapay, na idinodolot mi saimo bunga kan daga asin kan gibo kan mga kamot nin mga tawo, ini magigin para samo tinapay nin buhay.

B — Pag-omawon an Dios sagkod pa man.

P — Inoomaw ka, Kagurangnan, Dios nin gabos na linalang, huli ta sa saimong pagka-matinao nag-ako kami nin arak, na idinodolot mi saimo bunga kan balagon asin kan gibo kan mga kamot nin mga tawo, ini magigin para samo inomon nin kalag.

B — Pag-omawon an Dios sagkod pa man.

P — (*Tindog*) Magpamibi kamo, mga tugang: tanganing an sako asin an saindong atang maako man lugod kan Dios amang makakamhan.

B — Akoon man lugod kan Kagurangnan an atang sa saimong mga kamot para sa kaomawan asin kamurawayan kan saiyang ngaran, para man sa pakinabang niato asin kan bilog niyang banal na Simbahan.

Pamibi sa mga Dolot

P — Akoa, Kagurangnan, an samong mga atang, na huli kaiyan nahahaman an mga mamuraway na riribayan, tanganing, kaming nagdodolot kan mga tinawo mo, magkanigong saimo man sana mag-ako. Huli ki Cristo samong Kagurangnan.

B — Amen.

Prefacio V sa mga Domingo kan Ordinariong Panahon

An paglalalang

P — An Kagurangnan mapasaindo.

B — Asin sa saimong Espiritu.

P — litaas an mga puso.

B — Initaas mi na sa Kagurangnan.

P — Magpasalamat kita sa Kagurangnan, satuyang Dios.

B — Maninigo asin Dapat.

Totoong maninigo asin dapat, matanos asin nakakaligtas, na danay asin minsan saen magpasalamat kami saimo: Kagurangnan, banal na Ama, Dios na makakamhan na daing kasagkoran:

Ginibo mo an gabos na sangkap kan kinaban, asin hinusay an mga paliwat-liwat kan mga panahon; alagad an tawo hinimo mo sa ladawan mo, asin ipinasakop saiya an gabos na ngangalasan kan mga bagay, tanganing siring sa namamahala magin kagurangnan sa gabos mong linalang, asin sa atubang kan darakula mong gibo padagos na mag-omaw saimo huli ki Cristo samong Kagurangnan.

Kaya kaiba kan gabos na Angeles kami nag-oomaw saimo, nagkukurahaw sa magayagayang celebracion:

Gabos — Banal, Banal, Banal an Kagurangnan Dios ni mga Hukbo. An langit asin daga pano kan Saimong kamurawayan. Hosana sa kaitaasan. Paladan an minadigdi sa ngaran kan Kagurangnan. Hosanna sa kaitaasan.

Pamibi sa Eucaristia (*Luhod*)

P — Misterio kan Pagtubod.

B — An pagkagadan mo, Kagurangnan, ipinapamareta niamo, an Pagkabuhay mo liwat ipinapahayag, sagkod na ika magdatong.

P — Huli saiya, asin kaiba niya, asin sa saiya, saimo Dios Amang makakamhan kasarô kan Espiritu Santo, an gabos na kagagalan asin kamurawayan, sa gabos na kapanahonan kan mga panahon.

B — Amen.

RITO SA PAGCOMUNION

Ama Niamo (*Tindog*)

P — Natukduan kan mga nakakaligtas na tugon, asin pinatood kan diosnon na kaugalian, nangangahas kitang magsabi:

Gabos — Ama niamo, na yaon sa langit: pabanalon an ngaran mo; magdatong an kahadean mo; mangyari an boot mo sa daga nin siring sa langit. An samong kakanon sa aroaldaw itao mo samuya ngonian, asin patawadon mo kami sa samong mga kasâlan, siring na pinapatawad niamo an mga nagkakasalâ samuya; asin hare kami pagdaraha sa sugot; kundi agawa kami sa maraot.

P — Agawa kami sa gabos na maraot, namimibi kami Kagurangnan; warasan sa mga aldaw niamo an katoninongan, tanganing kaming natabangan kan saimong pagkaherak magin danay na talingkas sa kasâlan asin man ligtas sa gabos na kapurisawan: mantang kami naghahalat kan maogmang paglaom asin pagdatong kang samong Paraligtas na si Jesu Cristo.

B — Huli ta saimo an kahadean, asin an kapangyarihan, siring man an kamurawayan sa mga kapanahonan.

P — Jesu Cristong Kagurangnan, ika na nagsabi sa saimong mga Apostoles: Katoninongan iwinawalat ko saindo, an

sakong katoninongan itinatao ko saindo: hare paghilinga an samong mga kasâlan, kundi an pagtubod kan saimong Simbahan; asin papagkanigoa na siya mapatoninong asin magkaboronyog sosog sa saimong kabotan. Ika na nabubuhay asin naghahade sa kapanahonan kan mga panahon.

B — Amen

Pagpahayag kan Katoninongan

P — An katoninongan kan Kagurangnan danay na mapasaindo.

B — Asin sa saimong espiritu.

P — Magpatinaraohan kamo nin Katoninongan

Cordero

Gabos — Cordero kan Dios, na nagpapara kan mga kasâlan kan kinaban: kaheraki kami. Cordero kan Dios, na nagpapara kan mga kasâlan kan kinaban: kaheraki kami. Cordero kan Dios, na nagpapara kan mga kasâlan kan kinaban: tawi kami nin katoninongan.

Pag-alok sa Pagcomunyon (*Luhod*)

P — Uya an Cordero kan Dios, uya an nagpapara kan mga kasâlan kan kinaban. Paladan an mga inapod sa pamanggi kan Cordero.

Gabos — Kagurangnan bako akong maninigo na ika magdagos sa sakuyang harong: alagad magtaram ka sana, asin an sakong kalag maomayan.

Antifona sa Comunyon (*Jn 6, 51-52*)

(*Sinasambit kun mayong Awit sa Comunyon*)

Akoa an tinapay na buhay, na naghilig hale sa langit, olay kan Kagurangnan: an siisay man na magkakan kan tinapay na ini, mabubuhay sagkod pa man.

Pamibi Pakacomunyon (*Tindog*)

P — Mamibi kita. (*Halipot na pagtoninong*)

Huli kaining mga Sacramento, Kagurangnan, kaming nakisumaro ki Cristo, mapakumbabang nanggangayo-ngayo kan saimong pagkaherak, tanganing, kaming nakakaagid sa saiya digdi sa kinaban, magkanigong makisumaro saiya sa langit. Siya na nabubuhay asin naghahade sa kapanahonan kan mga panahon.

B — Amen.

Oratio Imperata (*Luhod*)

Gabos — Dios na samong Ama, minadulok kami saimo sa samong pangangaipo. Hinahagad mi saimo an pagligtas samo tumang sa pandemia kan Corona Virus na naglalakop ngonian asin nagdadara nin kagadanan.

Minahagad kami kan saimong tabang para sa mga tawong naghilingowa sa pag-adal kan hinalean, kan hiro, asin paglakop kaining pandemia. Giyahan mo an mga kamot asin isip kan mga experto sa salud tangani na sinda man makatabang nin may maninigong kakayahan asin pagmakulog sa mga may helang.

GIYA SA PAGMISA SA SEMANA

Ipinapamibi man niamo an mga naglilingkod sa banwaan, sa gobyerno asin pribadong agencia, tangani na makahanap sinda nin bulong sa helang na dara kaining pandemia. Ipinapamibi mi man an mga tinamaan na kan helang. Sinda man lugod maumayan tulos. Tawan mo kami ni biyaya na maghingowa para sa karahayan kan gabos asin sa mga nagsasakit.

Ini hinahagad mi huli ki Jesu Cristong Kagurangnan niamo, saimong Aki, na kaiba mong nabubuhay asin naghahade, kasarô kan Espiritu Santo, Dios sa kapanahonan kan mga panahon. Amen.

Divino Rostro, Kaheraki kami.

Nuestra Señora de Peñafrancia, Ipmibi mo kami.

(Angay man na hagadon an intercesion kan mga Patron kan parokya, simbahan, capilla, o barangay)

RITO SA PAGTATAPOS

Solemneng Bendicion (Tindog) Ordinariong Panahon I

P — An Kagurangnan mapasaindo.

B — Asin sa saimong espiritu.

P — Iduko an saindong mga payo asin mamibi para sa bendicion nin mahal na Dios. (Halipot na pagtoninong)

Bendicionan kamo asin amponon nin Kagurangnan

B — Amen.

P — Ipasirang nin Kagurangnan sa saindo an saiyang lalawgon asin kaherakan niya kamo.

B — Amen.

P — Atamanon niya kamo asin iwaras sa saindo an Katoninongan.

B — Amen.

P — Bendicionan kamo kan Dios na makakamhan: an Ama, asin an Aki, ✠ asin an Espiritu Santo.

B — Amen.

P — Lakaw kamo sa katoninongan ni Cristo.

B — Salamat sa Dios!

Agosto 17, Lunes

Ika-XX na Semana sa Ordinariong Panahon, Verde

Misa — Ika-XX na Semana sa Ordinariong Panahon

Mga Babasahon — Ez 24:15-24 | Deut 32:18-19. 20. 21 | Mt 19:16-22

Agosto 18, Martes

Ika-XX na Semana sa Ordinariong Panahon, Verde

Misa — Ika-XX na Semana sa Ordinariong Panahon

Mga Babasahon — Ez 28:1-10 | Deut 32:26-27. 27-28. 30 | Mt 19:23-30

Agosto 19, Miercoles

Ika-XX na Semana sa Ordinariong Panahon, Verde

o Memorial ni San Juan Eudes, Padi, Puti

o Memorial ni San Ezechiel Moreno, Padi, Puti

Misa — Ika-XX na Semana sa Ordinariong Panahon o Comun nin mga Pastor: III. Para sa mga Pastor - B. Para sa Sarong Pastor.

Mga Babasahon — Ez 34:1-11 | S 23:1-3. 3-4. 5. 6 | Mt 20:1-16

Agosto 20, Jueves

San Bernardo, Abad asin Doctor kan Simbahan, Puti

Misa — Comun nin mga Doctor kan Simbahan o Comun nin mga Santos asin Santas: III. Para sa mga Monje asin Religioso - A. Para sa Abad

Mga Babasahon — Ez 36:23-28 | S 51:12-13. 14-15. 18-19 | Mt 22:1-14

Agosto 21, Viernes

San Pio X, Papa, Puti

Misa — Comun nin mga Pastor: I. Para sa Papa o sa Obispo

Mga Babasahon — Ez 37:1-14 | S 107:2-3. 4-5. 6-7. 8-9 | Mt 22:34-40

Agosto 22, Sabado

Pagka-reyna ni Virgen Maria, Puti

Misa — Comun ki Santa Mariang Virgen

Mga Babasahon — Ez 43:1-7 | S 85:9-10 11-12. 13-14 | Mt 23:1-12

SCHEDULE OF LIVE SUNDAY MASSES

facebook.com/ArchdioceseOfCaceres | youtube.com/c/ArchdioceseOfCaceres

LIVE from the Chapel of the Good Shepherd, Archbishop's Residence, Naga City

06:00 am | **REV. FR. XAVIER R. AMOROSO**

(Bicol)

Director, Commission on Liturgical Music

05:00 pm

(English)

MOST REV. ROLANDO J. TRIA TIRONA, OCD, DD

Archbishop of Caceres

GIYA SA PAGHOROP-HOROP PARA SA MGA SARADIT NA KRISTIANONG KOMUNIDAD

1. Anong pagyayari sa buhay ko na nagluya an sakong pagtubod sa Kagurangnan?
2. Ano an mga tanda na ako nakamate nin danay na pagkamoot asin pag-ampon ni Hesus



sambanwá

GIYA SA PAGSAMBA KAN BANWAAN NIN DIOS

Ika-XX Domingo kan Ordinariong Panahon • 16 Agosto 2020

MOST REV. ROLANDO J. TRIA TIRONA, OCD, DD, Arzobispo kan Caceres
REV. FR. LUISITO A. OCCIANO, Direktor, Caceres Commission on Communications
REV. FR. GLENN C. RUIZ, Direktor, Commission on Liturgy
REV. FR. ERIC P. BOBIS, In-Charge, Social Media
JOHN PAUL M. AVEN asin **JUAN CARLOS R. MADRID**, Mga Editor

Hinimo asin inandam kan Archdiocesis kan Caceres, sa pangengenot kan Caceres Commission on Communications, asin Commission on Liturgy. Ciudad nin Naga, Pilipinas • 2020

f www.facebook.com/ArchdioceseOfCaceres | www.archdioceseofcaceres.org
yt www.youtube.com/c/ArchdioceseOfCaceres | @caceres_naga | @caceres.naga